

木足

變

延



楚辭卷二

古橋李陸時雍疏

九章



陸時雍敘曰九章章之也。纓蘭自姿無諛美人。離騷已既章之矣。而惜誦諸篇。抑何諛諛然者。當是時去九年而不復其所。呻詠當不止此矣。譬彼行邁將蹶於海。而狂言號之。蓀馨弗聞。何哉。朱晦翁曰。董子有言。為人君者。不可以不知。春秋前有讒而不見。後有賊而不知。嗚呼。豈獨

李思誌曰。晦翁此言是經術。論是持世語。

張煥如曰九章極縹綿之致

春秋也哉吁豈獨春秋也哉

惜誦以致愍兮發憤以抒情所非忠而言之兮指蒼

天以為正令五帝以折中兮戒六神與嚮服俾山川

以備御兮命咎繇使聽直音征令音零

陸時雍曰此誓詞也人不可告而正之天則情窮

而無所之矣斯拳拳不能自巳之衷也五帝五方

之帝六神日月星水旱四時寒暑之神也嚮對也

服服其罪也御侍也聽直聽而曲直之也

竭忠誠以事君兮反離羣而贅肫忘儼媚以背衆兮

待明君其知之言與行其可迹兮情與貌其不變故

相臣莫若君兮所以證之不遠肫叶於其反儼許緣反背音佩

陸時雍曰人固有日相與而日不知者我以為忠

彼以為佞此孝子所以無慈父而忠臣所以無察

主也或彼此之不同量或始信而終疑或讒入而

間生或愛深而望至所由非一端矣儼輕捷貌

吾誼先君而後身兮羌衆人之所仇也專惟君而無

他兮又衆兆之所讐也壹心而不豫兮羌不可保也

疾親君而無他兮有招禍之道也

張煥如曰不懟君不誹衆鬱鬱忠悃嗚咽自鳴誠千古善言人也

陸時雍曰人臣得罪於君猶可言也。得罪於左右不可道也。左右能移君心而用君之意者也。百親君未必見忠而一得罪於左右則禍立至此。離騷所以嫉黨人也。

思君其莫我忠兮。忽忘身之賤貧。事君而不貳兮。迷不知寵之門。忠何辜以遇罰兮。亦非余之所志也。行不羣以顛越兮。又衆兆之所哈也。紛逢尤以離謗兮。謗不可釋也。情況抑而不達兮。又蔽而莫之白也。

音之哈呼來反叶
呼其反白叶音弼

志叶

陸時雍曰作忠造罪違衆取哈此干載一大不平事故。九章細繹此意以明騷也。楚人謂相啁笑曰

哈

心鬱邑余侘傺兮。又莫察余之中情。固煩言不可結而詒兮。願陳志而無路。退靜默而莫余知兮。進號呼又莫余聞。申侘傺之煩惑兮。中悶瞀之怵怵。

中情一作善惡

詒音怡瞀音茂
怵叶從昆反

舊詒解佩纒以結言兮。又言不可結而詒疑古者以言寄意於人。必以物結而致之。如結繩之類。

昔余夢登天兮，竟中道而無杭。吾使厲神占之兮，曰：有志極而無旁，終危獨以離異。今曰：君可思而不可恃，故衆口其鑠金兮，初若是而逢殆。

殆叶徒
係反

陸時雍曰：人心多變，況於君臣。可思者，臣子之心也。不可恃者，君父之意也。杭，通作航，方兩舟而並濟也。厲，神古有泰厲、公厲、族厲之屬，謂死而無後者。

懲熱羹而吹整兮，何不變此志也。欲釋階而登天兮，猶有曩之態也。衆駭遽以離心兮，又何以爲此伴也。

同極而異路兮，又何以爲此援也。

態叶音替
援于願反

陸時雍曰：懲羹吹整，則見月而喘，畏有餘地矣。釋階登天，則絕迹而行，計有餘喪矣。登天何難，釋階何愚，則孤忠特達，何若是之疎也。屈原深於怨，故多自悔自艾之詞，而無嗷嗷於人之意，所以感動人心者至矣。極路所至之處也。

晉申生之孝子兮，父信讒而不好行。矯直而不豫兮，鮪功用而不就。吾聞作忠以造怨兮，忽謂之過言。九折臂而成醫兮，吾至今乃知其信然。

好叶呼鬪
反矯音倬

陸時雍曰九折臂而成醫將忠不可為耶奈何卒
從彭咸之所居也申生晉獻公之太子也其母夫
人死驪姬有寵於公而將害太子謂太子曰余夢
夫人必祭之太子祭致胙於公驪置毒焉試之犬
犬斃與小臣小臣亦斃姬泣曰賊由太子太子再
拜遂自經也世號為恭世子鮫事見天問

增弋機而在上兮尉羅張而在下設張辟以娛君兮
願側身而無所欲儻侗以干僚兮恐重患而離尤欲
高飛而遠集兮君罔謂女何之欲橫奔而失路兮蓋

堅志而不忍背膺脾以交痛兮心鬱結而紆軫

增則
儻反

尉音尉下叶音戶辟毗亦
反儻知然反重儲用反

舊詁增繳射鳥短矢也弋繳射也機張機以待發
也尉羅掩鳥網也辟開也與闢同或云弩背也儻
侗不進貌干僚謂求仕也脾中分也膺背中分痛
不可言也

陸時雍曰機網之密舉動絀之詩云萋兮斐兮成
是貝錦彼讒人者亦已太甚此伯奇所以流離萋
弘所以血碧也張辟娛君害忠良以快君心君臣

相、娛、賢、者、受、僂、其、言、抑、何、慘、耶、進、退、之、難、無、一、而、可、當、是、時、使、原、優、游、沅、湘、可、以、澤、畔、老、矣、而、多、設、艱、難、以、自、愁、苦、者、則、志、有、所、繫、每、摧、迫、而、不、自、安、也。

擣木蘭以矯蕙兮，繫申椒以爲糧。播江離與滋菊兮，願春日以爲糗芳。恐情質之不信兮，故重著以自明。

橋茲媚以私處兮，願會思而遠身。

質音致，橋居表反，會音增，明叶音芒。

身叶音商

舊詁：擣，春也；矯，揉也；繫，精細米也；糗，乾飯屑也；質，

猶交質之質，橋舉也；媚，謂所愛之道也；曾思慮害

遠身避患。

陸時雍曰：春日糗芳，備以需時；曾思遠身，哲士之

所能；忠臣之所不服爲者也。

右惜誦

陸時雍曰：此篇深病黨人發明禍本。

余幼好此奇服兮，年既老而不衰。帶長鋏之陸離兮，

冠切雲之崔嵬。被明月兮佩寶璐，世溷濁而莫余知。

兮。吾方高駢而不顧，駕青虬兮驂白螭。吾與重華遊，

孫鑣曰：是離

騷餘韻而微

較清徹

張煥知曰：語

意簡掉誦之

兮、瑤、之、圃、登、崑、嶠、兮、食、玉、英、吾、與、天、地、兮、比、壽、與、日、月、兮、齊、光、哀、南、夷、之、莫、吾、知、兮、且、余、將、濟、乎、江、湘、

丑歌反英
叶于姜反

陸時雍曰：鈇劍把切雲，言其高耳。朱晦翁以為冠名，恐未必崑嶠至高。玉英至潔，天地比壽，日月齊光，所謂卓然高遠，不與俗同者也。南夷謂楚。

乘、鄂、渚、而、反、顧、兮、歎、秋、冬、之、緒、風、步、余、馬、兮、山、臯、耶、余、車、兮、方、林、棨、舩、船、余、上、沅、兮、齊、吳、榜、而、擊、汰、船、容、與、而、不、進、兮、淹、回、水、而、凝、滯、朝、發、枉、渚、兮、夕、宿、辰、陽、

荀、余、心、之、端、直、兮、雖、辟、遠、其、何、傷、入、激、浦、余、儻、個、兮、迷、不、知、吾、所、如、深、林、杳、以、冥、冥、兮、乃、援、狄、之、所、居、山、峻、高、以、蔽、日、兮、下、幽、晦、以、多、雨、霰、雪、紛、其、無、垠、兮、雲、霏、霏、其、承、宇、

欸音哀風叶乎金反舩音零上時掌反
榜此孟反又音謗汰音泰滯叶五介反
隋一作渚辟僻同激徐呂反儻
個一作適迴狄余救反垠音銀

舊註鄂渚地名今鄂州也。欸歎聲。耶至也。一作低。

方林地名。舩船之有窻牖者。或曰小船也。榜櫂也。汰水波也。船不進而凝滯，亦戀故都也。枉，隋辰陽皆地名。水經云：沅水東至辰陽縣東南，合辰水沅。

水又東歷小灣謂之枉階激浦亦地名霰雨凍如珠將爲雪者也宇室簷也

哀吾生之無樂兮幽獨處乎山中吾不能變心以從俗兮固將愁苦而終窮接輿髡首兮桑扈羸行忠不必用兮賢不必以伍子逢殃兮比干菹醢與前世而皆然兮吾又何怨乎今之人余將董道而不豫兮固將重昏而終身

醢叶呼彼反

舊註接輿被髮佯狂後乃自髡桑扈羸行疑卽子桑伯子家語所謂不衣冠而處者也子胥相吳諫

吳王夫差令其伐越不聽被殺盛以鴟夷而浮之

江

亂曰鸞鳥鳳凰日以遠兮燕雀烏鵲巢堂壇兮露申辛夷死林薄兮腥臊並御芳不得薄兮陰陽易位時不當兮懷信侘傺忽乎吾將行兮

壇式衍反得薄之薄音博

舊註露申未詳

右涉江

舊註此篇多以余吾並稱詳其文意余平而吾倨也

陸時雍曰涉江山水生愁雲物增慨此便是後來詩賦之祖

皇天之不純命兮何百姓之震愆民離散而相失兮方仲春而東遷去故鄉而就遠兮遵江夏以流亡出國門而軫懷兮甲之鼉吾以行發郢都而去閩兮怊荒忽其焉極楫齊揚以容與兮哀見君而不再得望長楸而太息兮涕淫淫其若霰過夏首而西浮兮顧龍門而不見齊一作坐

陸時雍曰稱百姓稱民者皆哀籲於天而自呼之

詞仲春東遷感其候也甲之鼉以行猶憶其時也

郢都在漢南郡江陵縣閩里門也容與猶從容楫

從容順流而下豈知人心多絀結而不解乎楸梓

也望長楸而太息蓋存故也故人不見故物猶足

繫思顧龍門而不見則景沉物改無一之可即矣

夏首夏水口也浮榜不進而自流之意龍門楚都

南關二門一名龍門一名脩門蓋善思者無所撫

寄則不勝湮沒之悲有物怳臨又無限弔憑之感

憂來無方人莫之知其騷人之謂與

心嬋媛而傷懷兮，眇不知其所蹠。順風波而流從兮，
 焉洋洋而為客。凌陽侯之汜濫兮，忽翱翔之焉薄。心
 絀結而不解兮，思蹇產而不釋。將運舟而下浮兮，上
 洞庭而下江。去終古之所居兮，今逍遙而來東。羌靈
 寃之欲歸兮，何須臾而忘返。背夏浦而西思兮，哀故
 都之日遠。登大墳以遠望兮，聊以舒吾憂心。哀州土
 之平樂兮，悲江介之遺風。當陵陽之焉至兮，淼南渡
 之焉如。曾不知夏之為丘兮，孰兩東門之可蕪。蹠音薄

叶音拍絀音畫江叶音工
 上時掌反風叶孚金反

舊註蹠踐也。背夏浦而西思時未過夏浦故背之。
 而西向思郢也。水中高者曰墳。望望郢都也。淼澗
 漾無涯貌。於是始南渡大江矣。夏大屋也。丘荒墟
 也。兩東門郢城東關二門。懷王二十一年秦拔郢
 而楚徙陳不知在此後幾年也。

陸時雍曰：伏羲六佐金提主化俗鳥明主建福視
 默主災惡紀通為中職仲起主海陸陽侯主江海
 故云陽侯之波朱晦翁謂陽國之侯意坊記所稱
 殺繆侯而竊其夫人者歟而非也。陵陽楚地卞和

民封為陵陽侯即此

心不怡之長久兮憂與憂其相接惟郢路之遼遠兮
江與夏之不可涉忽若去不信兮至今九年而不復
慘鬱鬱而不通兮蹇佗僚而含感

感叶子
六反

舊詁考原初被放在懷王十六年至十八年復召
用之三十年秦約懷王與會原諫止之不從遂死
於秦頃襄王立復放之不知的在何年也

陸時雍曰故都日遠去路日長故曰惟郢路之遼
遠兮江與夏之不可涉蓋心欲去而不能身欲行

而無力也

外承歡之汨約兮。譙荏弱而難持。忠湛湛而願進兮。
妒被離而鄣之。彼堯舜之抗行兮。瞭杳杳其薄天眾。
讒人之嫉妒兮。被以不慈之偽名。憎慍愉之修美兮。
好夫人之忼慨。眾踈蹠而日進兮。美超遠而愈邁。

音汨

綽譙市林反荏音稔湛徒感反被離之被作披鄣音
章瞭音了天叶鐵因反慍紆粉反愉力允反忼苦郎
反蹠思葉反

舊詁汨約即綽約譙誠也荏亦弱也湛湛深沉貌
被離衆盛貌慍蘊積也愉有所思而欲明之意蹠

蹠行貌

陸時雍曰小人饒有媚骨故多洵約可喜其承歡也常在意旨色笑之間寢處便安之際多飾情態傾動君心誠令人心意軟弱而難自主也慍倫心有所念而不敢自明之意忼慨激昂抗厲也君子忠君愛國其嘉謀密計不敢輕以告人小人飾詐翹名托為忼慨常有囂然欲動悍然難下之意君心不明深厚持重者見謂無味而吐棄儼便矯捷者以為得意而相親所以佞日進而忠日遠也

張煥如曰二語可作絕命詞矣

亂曰曼余日以流觀兮冀壹反之何時鳥飛返故鄉兮狐死必首丘信非吾罪而棄逐兮何日夜而忘之舊註曼遠意首丘以首枕丘而死不忘所自生也

右哀郢

心鬱鬱之憂思兮獨永歎乎增傷思蹇產之不釋兮曼遭夜之方長悲秋風之動容兮何四極之浮浮數惟蓀之多怒兮傷余心之優優蓀音孫憂音憂

陸時雍曰秋風一生草木變色時天道反常萬物皆搖落而不着矣然則惟蓀多怒芳草寧有自固

之情乎。此心之所以愁也。悒悒愁貌。

願遙赴而橫奔兮。覽民尤以自鎮。結微情以陳詞兮。

矯以遺夫。美人昔君與我成言兮。曰黃昏以為期。羌

中道而回畔兮。反既有此他志。憍吾以其美好兮。覽

余以其修姱。與余言而不信兮。蓋為余而造怒。孫鑛曰。悅語。鎮音珍遺。

去聲。志叶音之。憍與驕同。姱叶音戶。

陸時雍曰。民尤謂民之得過者。民之得過。常以忠

而致疑。以愛而取怒。願遙赴而橫奔。逕自進於君

也。覽民尤之故。則畏而終自止矣。結微情以遺之。

庶幾君心之一悟乎。矯舉也。憍矜也。君既有此他

志。則與余有相勝之思。相陵之意焉。故憍吾以其

美好。覽余以其修姱。蓋嫉余之眾芳而為是舉也。

滿堂兮。美人言笑。宴兮。惜惜。心目。余兮。嶙峋。乃知

君本無怒。為余造也。敵余惟恐其不勝。去余惟恐

其不力。奈黃昏之期。而一至此乎。

願承間而自察兮。心震悼而不敢悲。夷猶而冀進兮。

心怛傷之憺憺。茲歷情以陳辭兮。蓀詳聾而不聞。固

切人之不媚兮。眾果以我為患。憺叶徒敢反。詳與

伴同患。叶胡門反。

孫鑛曰。悅語。

陸時雍曰察白也。愴愴猶漠漠。心之百計一無所
之故。常漠漠。切人不媚。與世何害。而衆以爲患者。
則以一人正襟而四坐。不得狂語故也。

初吾所陳之耿著兮。豈不至今其庸亡。何獨樂斯之
蹇蹇兮。願蓀美之可完。望三五以爲像兮。指彭咸以
爲儀。夫何極而不至兮。故遠聞而難虧。善不由外來
兮。名不可以虛作。孰無施而有報兮。孰不實而有獲。

又曰。疾語

完叶胡光反。施始
豉反。實當作殖。

陸時雍曰。耿明也。庸亡。何庸亡也。修行則名章。任

賢則國昌。然忍痛可以彈直。屈心可以爲治。農非
好勞。冀有穫也。君臣嬉嬉不亡。有幾。

少歌曰。與美人之抽思兮。并日夜而無正。憍吾以其
美好兮。傲朕辭而不聽。

陸時雍曰。少歌樂章。音節之名并合也。日夜不分
何時。而且將孰從而正之。

倡曰。有鳥自南兮。來集漢北。好姱佳麗兮。胖獨處此
異域。旣惇獨而不羣兮。又無良媒在其側。道卓遠而
目忘兮。願自申而不得望。北山而流涕兮。臨流水而

太息倡讀唱惇渠營反側

叶莊力反卓一作連
舊詁倡歌之音節所謂發歌句者也屈原生於夔

峽而仕於鄢郢是自南而集於北也

望孟夏之短夜兮何晦明之若歲惟郢路之遼遠兮
竟一夕而九逝曾不知路之曲直兮南指月與列星
願徑逝而不得兮竟識路之營營何靈竟之信直兮
人之心不與吾心同理弱而媒不通兮尚不知余之
從容

陸時雍曰營竟識路形莫與俱指月列星其不遑

假寐已久矣九年不復何須臾之忘反乎從容安
意自如之意

亂曰長瀨湍流沂江潭兮狂顧南行聊以娛心兮軫
石歲嵬蹇吾願兮超回志度行隱進兮低徊夷猶宿
北姑兮煩冤瞽容實沛徂兮愁歎苦神靈遙思兮路
遠處幽又無行媒兮道思作頌聊以自救兮憂心不
遂斯言誰告兮

潭叶音尋歲音隈嵬吾回反願進音
叶或願叶魚靳反或進叶薦告叶垢

陸時雍曰瀨水淺處湍急流也逆流而上曰沂狂
顧左右疾視也軫方也軫石歲嵬志願似之超回

超越邪曲也行隱進者獨寢獨行不皎皎以示人也
也替容替亂之容道思且行且思也菽解也

右抽思

陸時雍曰此篇凡三致意於良媒矣

張煥如曰二語寫到神魄不營處可謂極其妙穆矣

滔滔孟夏兮草木莽莽傷懷永哀兮汨徂南土。眴兮杳杳孔靜幽默鬱結紆軫兮離愍而長鞠。撫情效志

兮冤屈而自抑。

莽音姆眴與瞬同離音麗鞠叶音給

舊詁汨行貌南土泝沅湘也眴目數搖動之貌杳深冥意紆詰曲也軫痛也離遭也鞠窮也撫循

也效猶覈也

陸時雍曰抑按止之也冤屈不自抑則有暴怒之情誹訕之言矣

剗方以為園兮常度未替易初本迪兮君子所鄙章畫志墨兮前圖未改內厚質正兮大人所賊巧倕不斲兮孰察其揆正玄文處幽兮矇瞶謂之不章離婁微睇兮替以為無明

剗五官反改叶音既內作訥厚一作直賊史作盛倕音垂

陸時雍曰剗圓削也替廢也剗方為園而常度未替所謂性有純而不可為也迪道也章明畫界限

也猶是非畫然之畫志墨志意繩墨也所賦所盛
 美也。惟舜時工正無睥曰瞽有睥不明曰矇世不
 能用君子不知自咎而反謂君子之無能則可笑
 莫甚於此

變白以為黑兮倒上以為下鳳凰在笈兮雞鶩翔舞
 同糶玉石兮一概而相量夫惟黨人之鄙固兮羌不

知余之所臧

笈音奴鶩音木糶女救反

陸時雍曰玉石而糶則無貴賤之可言矣君子小
 人而混則無賢愚之可顯矣笈籠也概平斗斛木

也

任重載盛兮陷滯而不濟懷瑾握瑜兮窮不知所示
 邑犬羣吠兮吠所怪也非俊疑傑兮固庸態也

瑾音僅

陸時雍曰小人嗷嗷視君子以為固然迨見效則
 甚駭矣惟懷而不試遂為眾兆之所哈也在衣為
 懷在手為握瑾瑜美玉也非毀也智過千人謂俊
 十人謂傑庸廝賤人也

文質疏內兮眾不知余之異采材朴委積兮莫知余
 之所有重仁襲義兮謹厚以為豐重華不可選兮孰

知余之從容

疏史作疎內音訥采叶此禮反有叶于彼反重平聲選當作選與连同

舊詰文質文不艷也疏濶略也材木之中用者朴

未斲之質也選遇也從容舉動自得之意

古固有不並兮豈知其故也湯禹久遠兮邈不可慕

也懲違改忿兮抑心而自強離慙而不遷兮願志之

有像

朱本故上有何字邈下有而字故慕二韻下皆無也字強叶其兩反

舊詰有像言可為法則

進路北次兮日昧昧其將暮舒憂娛哀兮限之以大故

舊詰言將北歸郢都而日暮不前欲舒憂娛哀而

死期將至也

亂曰浩浩沅湘分流汨兮脩路幽蔽道遠忽兮懷質

抱情獨無匹兮伯樂既沒驥焉程兮民生稟命各有

所錯兮定心廣志余何畏懼兮增傷爰哀永歎喟兮

世溷濁莫我知人心不可謂兮知死不可讓願勿愛

兮明告君子吾將以為類兮

此段悉從朱本汨音骨水流聲又音鶻涌波也

匹當作正曾音增爰叶於既反

右懷沙

陸時雍曰懷沙情窮語迫太史公獨載此篇以
卒原志也

思美人兮擘涕而竚。貽媒絕路阻兮言不可結而詒。
蹇蹇之煩寃兮陷滯而不發。申旦以舒中情兮志沉
苑而莫達。願寄言於浮雲兮遇豐隆而不將。因歸鳥
而致辭兮羌迅高而難當。昔高辛之靈晟兮遭玄鳥
而致詒。欲變節以從俗兮媿易初而屈志。
詒叶音異苑
音鬱晟音盛

陸時雍曰申旦達旦也是非不明夢夢長夜是以

有申旦之思。媒絕路阻苑柳莫通是以有浮雲之
想。竚久立也貽直視也苑積也玄鳥致詒因上言
歸鳥難當而感及之也。

獨歷年而離愍兮羌馮心猶未化。寧隱閔而壽考兮
何變易之可為。知前轍之不遂兮未改此度。車既覆
而馬顛兮蹇獨懷此異路。勒騏驥而更駕兮造父為
我操之。遷遂次而勿驅兮聊假日以須。肯指嶓冢之
西隈兮與纁黃以為期。
馮音憑化叶音媯更音庚
造七到反嶓音波纁音熏

陸時雍曰直道易蹶所以車覆馬顛勒騏驥以更

駕亦無他途之可出也。假日須時，庶其一遇。纁黃為期，死而後已耳。馮憤懣也。隱閔壽考憂愁以終身也。造父善御，周穆王時人，操執轡也。遂次，遂迷也。纁，淺絳色；纁黃，日將入色也。嶓冢，在隴西氏道。縣，漢中記曰：嶓冢以東水皆東流，嶓冢以西水皆西流。漢水出武都氏道，縣漾山為漾水，禹貢導漾東流為漢是也。嶓冢北即終南，華熊諸峰南即蜀東諸峰，或謂蜀東諸峰皆嶓冢，謂其岡嶺綿亘耳。開春發歲，今白日出之悠悠，吾將蕩志而愉樂兮，遵

江夏以娛憂，擘大薄之芳蒹兮，搴長洲之宿莽。惜吾不及古之人兮，吾誰與玩此芳草。
莽叶莫古反
草叶七古反
 陸時雍曰：將欲蕩志娛憂，適覽物興思而更傷其懷抱。

解篇薄與雜菜兮，備以為交佩。佩繽紛以繚轉兮，遂萎絕而離異。吾且儻個以娛憂兮，觀南人之變態。竊快在其中兮，心兮揚厥憑而不竢。芳與澤其雜糅兮，羌

芳華自中出。
篇音匾，繚音了，萎於危反，態叶替出叶尺遂反。
 舊註：篇，篇蓄也，似小梨赤莖節好生道傍薄叢也。

交佩左右佩也。蕭蓄雜菜皆非芳草，故解去之。而以所備之蘭茝為左右佩也。

陸時雍曰：憑滿也。芳芬滿內外，揚不能復，埃欲掩之而不得也。此亦抑菀中語，而後世遂以為露材。楊已嘗觀古昔聖賢當窮困之時，不嫌自命，所以警世之聾聵者，而必欲使之貶損，韜晦自同愚賤。抑又非其情矣。

紛郁郁其遠烝兮，滿內而外揚。情與質信可保兮，羌居蔽而聞章。令薜荔以為理兮，憚舉趾而緣木。因芙

蓉以為媒兮，憚褰裳而濡足。登高吾不說兮，入下吾

不能固朕形之不服兮，然容與而狐疑。

蹇起
虔反

陸時雍曰：烝，進也。緣木，自煩濡足。自汗，褰裳舉趾。其情有難於自出者，寧偃蹇而不忍為也。彼求人者，獨無自愛之情乎。

廣遂前畫兮，未改此度也。命則處幽，吾將罷兮。願及白日之未暮也，獨煒煒而南行兮，思彭咸之故也。

右思美人

惜往日之曾信兮，受命詔以昭時。奉先功以照下兮，

明法度之嫌疑國富強而法立兮屬貞臣而日嫉秘
 密事之載心兮雖過失猶弗治心純厖而不泄兮遭
 讒人而嫉之君含怒以待臣兮不清激其然否蔽晦
 君之聰明兮虛惑誤又以欺弗參驗以考實兮遠遷
 臣而弗思信讒諛之溷濁兮賊氣志而過之

治平聲
否音非

陸時雍曰按史記懷王使屈平造為憲令屬草藁
 未定上官大夫見而欲奪之屈平不與因讒之曰
 王使屈平為令眾莫不知每一令出平伐其功曰
 非我莫能為也王怒而疏屈平當是時懷王既入

上官大夫之讒而平不能婉以自白意平之為人
 朴忠而寡智者也秘密事之載心雖過失猶弗治
 則信心略迹闢主所弗諒矣又曰鮌婞直以亡身
 雖功用而不就則憤悼而過喻者與昭時昭明四
 時之政治也過之督過之也

何貞臣之無辜兮被讟謗而見尤慙光景之誠信兮
 身幽隱而備之臨沅湘之玄淵兮遂自忍而沉流卒
 沒身而絕名兮惜靡君之不昭君無度而弗察兮使
 芳草為藪幽焉舒情而抽信兮恬死亡而不聊獨鄣

靡而蔽隱兮使貞臣而無由

靡古麤字聊叶音雷部音章

李挺曰此語
晶懸日月

陸時雍曰屈原過非已作而慙見光景憤忠信之

不昭也身處幽隱而不敢不為之備懼鬼神之見

謂也身死名滅而惜靡君之不昭忠愛之無已也

萬象昭昭我獨點汶對之所以慙耳記曰無節於

內者其察物弗省矣王逸所謂上無檢押以知下

也蘭萎於澤謂之數幽聊苟且也謂苟且以求生

也

聞百里之為虜兮伊尹烹於庖厨呂望屠於朝歌兮

甯戚歌而飯牛不逢湯武與桓繆兮世孰云而知之

吳信讒而弗味兮子胥死而後憂介子忠而立枯兮

文君寤而追求封介山而為之禁兮報大德之優游

思久故之親身兮因縞素而哭之

厨叶音稠之叶啜尤反

舊註晉獻公虜虞君與其大夫百里奚以百里奚

為秦繆公夫人勝百里奚亡走宛楚鄙人執之繆

公聞其賢以五羊皮贖之釋其囚與語國事大悅

授以政號曰五殺大夫伊尹甯戚事見離騷天問

子胥事見涉江晉文公為公子時遭驪姬之譖出

張煒如曰誦
帶帶風

奔介子推從行道乏食子推割股肉以食文公文
 公得國賞從行者不及子推子推入綿上山中文
 公寤而求之子推不出文公因燒其山子推抱樹
 自焚而死遂封原上之田號曰介田禁民樵採使
 奉子推祭祀以報其德又縞素而哭之親身謂割
 股也

或忠信而死節兮或訑謾而不疑弗省察而按實兮
 聽讒人之虛辭芳與澤其雜糅兮孰申旦而別之何
 芳草之蚤歿兮微霜降而下戒諒聰不明而蔽靡兮

使讒諛而日得自前世之嫉賢兮謂蕙若其不可佩

如佳冶之芬芳兮慕母姣而自好雖有西施之美容

兮讒如人以自代願陳情以白行兮得罪過之不意

情冤見之日明兮如列宿之錯置

訑音移謾謾官反
戒叶居得反佩叶

音備萋音謨好叶虛
既反代叶徒計反

舊詰若杜若萋母黃帝妻貌甚醜列宿錯置言較
 著明白也

乘騏驥以馳騁兮無轡銜而自載乘汜汭以下流兮

無舟楫而自備背法度而心治兮辟與此其無異寧

張煥如曰語
意頓叠如弊

溘死而流亡兮恐禍殃之有再不畢辭以赴淵兮惜
靡君之不識騏驥王逸作駑馬載叶于賜反汎音汎汎音敷再叶于賜反識音志

舊註轡馬韁銜馬勒也汎汎編竹木以渡水者既

無騏驥但乘駑馬又無轡銜與御者而但自乘載

既無舟航但乘汎汎又無舟人與維楫而但自備

禦其危亦甚矣禍殃有再恐不死則邦其淪喪而

辱為臣僕是也

右惜往日

陸時雍曰此篇專於諷君不勝憂危之感

后皇嘉樹橘徠服兮受命不遷生南國兮深固難徙

更壹志兮綠葉素榮紛其可喜兮曾枝剡棘圓果搏

兮青黃雜糝文章爛兮精色內白類任道兮紛緼宜

修姱而不醜兮

徠古來字服叶蒲北反國音域喜叶居例反曾音層剡以冉反圓果一作

園實搏音團爛叶盧干反道叶徒苟反紛音墳緼音氲

舊註漢書云江陵千樹橘正楚地受命不遷記所

謂橘踰淮而化為枳也曾重疊也剡利也精色外

色精明也紛緼盛貌

嗟爾幼志有以異兮獨立不遷豈不可喜兮深固難

徙廓其無求兮蘇世獨立橫而不流兮閉心自慎終
不過失兮秉德無私參天地兮願歲并謝與長友兮
淑離不淫梗其有理兮年歲雖少可師長兮行比伯
夷置以為像兮

蘇當作疎閉必結反友叶
羊里反比音鼻像上聲

舊註此下申前意以明已志并謝猶永謝也離孤
特梗強也伯夷叔齊孤竹君之子也兄弟遜國俱
去首陽山下武王伐紂伯夷叔齊諫門父死不葬
爰及于戈可謂孝乎以臣弑君可謂忠乎左右欲
殺之太公曰不可引而去之遂不食周粟而死

右橘誦

悲回風之搖蕙兮心冤結而內傷物有微而隕性兮
聲有隱而先倡夫何彭咸之造思兮暨志介而不忘
萬變其情豈可蓋兮孰虛偽之可長

張煥如曰語
意清微

陸時雍曰微物隕性風聲先倡物之感傷相因而
起世之秋人心之憂憤皆若此矣風之聲聲物之
形形孰無根而結響孰無實而造情無虛偽之可
長故忠貞者之可核也

鳥獸鳴以號羣兮草苴比而不芳魚葺鱗以自別兮

蛟龍隱其文章故荼薺不同畝兮蘭茝幽而獨芳

子苴

呂反比音鼻

陸時雍曰生日草枯曰苴荼苦菜薺甘菜也秋風一起萬物斂藏荼薺不同畝而同衰惟蘭茝幽而獨芳所云無虛偽之可長也

惟佳人之永都兮更統世以自貺眇遠志之所及兮憐浮雲之相羊介眇志之所感兮竊賦詩之所明

更平

聲貺叶荒

陸時雍曰佳人原自謂也統世統承先世自貺自

襲其寵貺也浮雲無依中心徘徊托與之俱相羊

浮遊貌

惟佳人之獨懷兮折芳椒以自處曾歔歔之嗟嗟兮獨隱伏而思慮涕泣交而淒淒兮思不眠以至曙終長夜之曼曼兮掩此哀而不去寤從容以周流兮聊逍遙以自恃傷太息之愍憐兮氣於邑而不可止

音曾

增於音鳥邑鳥合反又並如字

紕思心以為纒兮編愁苦以為膺折若木以蔽光兮隨飄風之所仍存髣髴而不見兮心踴躍其若湯撫

佩衽以案志兮超惘惘而遂行

紉吉西反

陸時雍曰紉戾也慙光景之誠信故折若木以蔽光欲浮遊而不歸故隨飄風之所仍也存存省存髮髯而不見蓋有所思也瑤琚珮兮璆然而不鳴蘭茝兮而暗馨抑心兮而私自憐所謂撫珮衽而案志也超惘惘而遂行復激昂而自強也衽裳際也

歲芻芻其若頽兮肯亦冉冉而將至
頽蘅槁而節離兮芳已歇而不比
憐思心之不可懲兮證此言之不

可聊寧溘死而流亡兮不忍此心之常愁
孤子唵而枝淚兮放子出而不還
孰能思而不隱兮昭彭咸之

所聞

芻音忽比音鼻聊叶音雷唵古吟字枝音吻還叶胡昆反

舊註時謂衰老之期也節離蓋草枯則節處斷落也比合也聊賴也隱痛也

登石巒以遠望兮路眇眇之默默入景響之無應兮
聞省想而不可得愁鬱鬱之無快兮居戚戚而不可
解心鞿羈而不開兮氣繚轉而自締穆眇眇之無垠
兮莽芒芒之無儀聲有隱而相感兮物有純而不可

張煒如曰非
思纏愁磨者
不潦倒至此

為邈漫漫之不可量兮縹綿綿之不可紆愁悄悄之
常悲兮翩冥冥之不可娛凌大波而流風兮託彭咸

之所居

景於境反葛洪始加多為影字解叶
居豈反締音弟縹匹妙反紆音迂

陸時雍曰入景響之無應其鬼徑耶聞省想而不
得抑何無人緒也聲隱相感最足撩愁而物之純
者則堅確而不可為也秋氣愈高孤衷愈凜豈因

蕭瑟之感摧折其抗厲之情乎此以終托彭咸之
所居也山小而銳曰巒繚紜戾也締結也儀象也
縹微細也紆縈也翩飛貌冥冥遠去也此皆言愁

緒之不可聊也流猶隨也

上高巖之峭岍兮處雌蜺之標顛據青冥而攄虹兮
遂儵忽而捫天吸湛露之浮涼兮漱凝霜之雰雰依
風穴以自息兮忽傾寤以嬋媛馮岷嶠以激霧兮隱
岫山以清江憚涌湍之礚礚兮聽波聲之洶洶紛容
容之無經兮罔芒芒之無紀軋洋洋之無從兮馳委
移之焉止漂翻翻其上下兮翼遙遙其左右汜滴滴

其前後兮伴張弛之信期

蜺五訖反標匹小反儵音
叔捫音門湛丁感反雰音

分叶孚袁反馮皮冰反隱於靳反江音虹礚苦蓋反
洶音匈右叶羽已反滴音決伴與叛同期叶上聲

陸時雍曰無聊之極神鬼不居故遂爲此飄忽蕩
颺而上極至高下臨至潔也此卽遠遊所自作矣
吸湛露之浮涼漱凝霜之雰雰此真不啻飲冰而
無奈嬋媛其故宇也登崑崙以激霧隱岐山以清
江何其快也憚涌湍之礚礚聽潮聲之洶洶無憂
擊五衷之太苦乎其心緒旣已煩亂而張弛之度
復不失期又何卓也湛厚貌風穴卽宋玉所謂土
囊之口是也張華博物志風山之首方高三百里
風穴如電突深三十里春風從此而出又荊州佷
山有穴口大數尺名風井夏則風出冬則風入出
入之間吹拂左右常淨所謂風穴大都類此岷與
岷同在蜀郡江水所出也容容紛亂貌遙遙當作
搖搖此皆言此身之無所止也

觀炎氣之相仍兮窺煙液之所積悲霜雪之俱下兮
聽潮水之相擊借光景以往來兮施黃棘之枉策求
介子之所存兮見伯夷之放迹心調度而弗去兮刻
著志之無適曰吾怨往昔之所冀兮悼來者之怵怵
浮江淮而入海兮從子胥而自適望大河之洲渚兮

張煥如曰詘然而止

悲申徒之抗迹驟諫君而不聽兮任重石之何益心
結而不解兮思蹇產而不釋怨叶它

舊詰煙液者炎氣成煙煙又凝而為液也光景神
光電景以棘為策既有芒刺而又枉曲則馬傷深
而行愈速調度二子之法度也怨怨憂貌往昔所
冀欲有為於當時來者怨怨將赴河而死也申徒
狄諫紂不聽負石自沉於河

右悲回風

楚辭卷二終

楚辭卷三

遠遊

古樵李陸時雍疏

李挺曰簡折
奧卓是欽脚
痕

陸時雍敘曰憂嗜死樂樂生使西王母必以編
愁為膺則其趣不及殤子屈原之欲久視非其
質矣語云俟河之清人壽幾何使世有千歲人
安知堯舜不旦暮也哉其身可摧志不可殞至
有欲扶眼觀寇寄靈未瞑者於世何決絕也是
豈有惟蓀之慮也夫

悲時俗之迫阨兮願輕舉而遠遊質菲薄而無因兮
 焉託乘而上浮遭沉濁而汙穢兮獨鬱結其誰語夜
 耿耿而不寐兮魂營營而至曙惟天地之無窮兮哀
 人生之長勤往者余弗及兮來者吾不聞

陸時雍曰此三五盛治之思也往者弗及來者弗
 聞則蘭茝之願孤所以欲久世無死以庶幾於一
 遇也神則翔於寥廓意則期於來茲則當前之不
 適蓋可知矣

步徙倚而遙思兮怊惝恍而永懷意荒忽而流蕩兮

心愁悽而增悲神儵忽而不反兮形枯槁而獨留內
 惟省以端操兮求正氣之所由漠虛靜以恬愉兮澹
 無爲而自得聞赤松之清塵兮願承風乎遺則貴真
 人之休德兮美往世之登仙與化去而不見兮聲名
 著而日延奇傳說之託辰星兮羨韓衆之得一形穆
 穆以寢遠兮離人羣而遁逸

怊音超惝昌兩反恍
 于往反懷叶胡威反

陸時雍曰列仙傳赤松子神農時雨師服水玉教
 神農能入火自燒至崑崙山上西王母石室隨風
 雨上下炎帝少女追之亦得仙俱去莊子云傳說

得之以相武下奄有天下乘東維騎箕尾而比於
 列星今尾上有傳說星是也辰星東方蒼龍之體
 心尾箕之星所謂天辰也劉根初學道到華山見
 一人乘白鹿根稽首乞一言神人曰聞有韓衆否
 我是也

因氣變而遂曾舉兮忽神奔而鬼怪時髮鬣以遙見
 兮精皎皎以往來超氛埃而淑郵兮終不及其故都
 免衆患而不懼兮世莫知其所如恐天時之代序兮
 耀靈畢而西征微霜降而下淪兮悼芳草之先薶聊
 仿佯而逍遙兮永歷年而無成誰可與玩斯遺芳兮
 長鄉風而舒情高陽邈以遠兮余將焉所程蕭今作零仿音

張煥如曰此非度世語知其源于託者

旁鄉一作向

陸時雍曰鄉風舒情知相接者誰耶亦聊以自寄耳淑郵言善而尤絕也

重曰春秋忽其不淹兮奚久畱此故居軒轅不可攀
 援兮吾將從王喬而娛戲餐六氣而飲沆瀣兮漱正
 陽而含朝霞保神明之清澄兮精氣入而麤穢除直重

用反沆胡朗反瀼音械霞叶音胡

舊註軒轅黃帝名王喬周靈王太子晉也好吹笙
 作鳳鳴遇浮丘公接之仙去六氣者陵陽子明經
 言春食朝霞日始欲出黃氣也秋食淪陰日沒以
 後赤黃氣也冬食沆瀣北方夜半氣也夏食正陽
 南方日中氣也并天地玄黃之氣為六氣

順凱風以從遊兮至南巢而壹息見王子而宿之兮
 審壹氣之和德曰道可受兮而不可傳其小無內兮
 其大無垠毋滑而魂兮彼將自然壹氣孔神兮於中
 夜存虛以待之兮無為之先庶類以成兮此德之門

垠叶魚堅反滑一作瀾並音
骨存叶才緣反門叶謨連反

聞至貴而遂徂兮忽乎吾將行仍羽人於丹丘兮雷
 不死之舊鄉朝濯髮於湯谷兮夕晞余日於九陽吸
 飛泉之微液兮懷琬琰之華英玉色頰以晚顏兮精
 醇粹而始壯質銷鑠以汨約兮神要眇以淫放
 陸時雍曰丹丘晝夜常明即丹山中有丹穴鳳鳥
 所自出也湯谷上有扶木九日居下枝一日居上

湯音陽余目下於字一作兮琬音宛琰音剡英叶
於姜反頰音茗普經二反晚音晚又音萬汨音綽

枝飛泉日入之氣也山海經稷澤多白玉是有玉

膏黃帝是食是饗。所謂懷琬琰之華英。類此。莊子
藐姑射之山。有神人焉。綽約若女子。綽約柔弱貌。
頽歛容貌。晚澤也。

嘉南州之炎德。兮麗桂樹之冬榮。山蕭條而無獸兮。
野寥漠其無人。載營魄而登霞兮。淹浮雲而上征。命
天闔其開關兮。排閭闔而望予。召豐隆使先導兮。問
太微之所居。集重陽入帝宮兮。造旬始而觀清都。朝
發軔於太儀兮。夕始臨乎於微閭。宥與寂同霞古遐字借用

陸時雍曰太微宮垣十星在翼軫北重陽天氣清

陽之所也詩含神霧云地去天一億五萬里則一

億五萬里以上皆天氣矣故天有九重則重陽之

謂也天地交會之際日宸宸者帝之所居也太微

者帝庭清都者帝都也旬始星見北斗傍氣如雄

雞於微閭周禮東北曰幽州其山鎮曰醫無閭

屯余車之萬乘兮。紛容與而並馳。駕八龍之蜿蜿兮。
載雲旗之透蛇。建雄虹之采旄兮。五色雜而炫燿。服
偃蹇以低昂兮。驂連蜷以驕驚。騎膠葛以雜亂兮。班
曼衍而方行。撰余轡而正策兮。吾將過乎句芒。歷太

張煥如曰優游曼衍指顧自如真若按步隊而校班行者何其裕也

晷以右轉兮前飛廉以啓路陽杲杲其未光兮凌天
 地以徑度風伯爲余先驅兮氛埃辟而清涼鳳凰翼
 其承旂兮遇蓐收乎西皇擘彗星以爲旂兮舉斗柄
 以爲麾叛陸離其上下兮遊驚霧之流波昔曖曖其
 曛莽兮召玄武而奔屬後文昌使掌行兮選署衆神
 以並轂路曼曼其修遠兮徐弭節而高厲左雨師使
 徑待兮右雷公而爲衛

炫音玄 蟻音拳 曼莫半反 衍
 戈戰反 句音勾 辟必亦反 於

卽旌字 叛音泮 波叶補 基反 曖烏感反 蹇徒
 感反 躓音黨 莽莫郎反 屬音濁 曼莫干反

陸時雍曰容與從容貌透蛇宛轉貌偃蹇恣睢貌

連蜷屈曲貌服衡下夾轅兩馬驂衡外挽軻兩馬

膠葛雜亂貌曼衍泮渙貌句芒木神月令東方甲

乙其帝太皞其神句芒太皓卽太皞庖羲氏也西

方庚辛其帝少皞其神蓐收西皇卽少昊也斗柄

杓也麾旗屬曖曖昏暗貌曛日不明也玄武北方

七宿龜蛇也位在北方故曰玄身有鱗甲故曰武

也文昌在紫微宮北斗魁前六星如匡形屬憑陵

之意

欲度世以忘歸兮意恣睢以担橋內欣欣而自美兮

張慎如曰此當與西王母宴穆天子于瑤池盡出寶器者並為一觀釣天之樂不屬人間矣

聊。媮。娛。以。淫。樂。涉。青。雲。以。汜。濫。游。兮。忽。臨。睨。夫。舊。鄉。
僕。夫。懷。余。心。悲。兮。邊。馬。顧。而。不。行。思。故。鄉。以。想。像。兮。
長。太。息。而。掩。涕。汜。容。與。而。遐。舉。兮。聊。抑。志。而。自。弭。指。
炎。帝。而。直。馳。兮。吾。將。往。乎。南。疑。覽。方。外。之。荒。忽。兮。沛。
澗。瀆。而。自。浮。祝。融。戒。而。蹕。御。兮。騰。告。鸞。鳥。迎。處。妃。張。
咸。池。奏。承。雲。兮。二。女。御。九。韶。歌。使。湘。靈。鼓。瑟。兮。令。海。
若。舞。憑。夷。玄。螭。蟲。象。並。出。進。兮。形。繆。虬。而。透。蛇。雌。蜺。
便。娟。呂。增。撓。兮。鸞。鳥。軒。翥。而。翔。飛。音。樂。博。衍。無。終。極。
兮。焉。乃。逝。以。徘徊。担音桀橋音矯樂叶五教反汜汎同浮叶扶毗反歌叶居支切螭丑

知反繆於九反虬巨九反蜺五結反便昆連反娟於緣反撓而照反

陸時雍曰邊馬謂兩驂也南方丙丁其帝炎帝其

神祝融澗瀆謂元氣鴻濛也蹕止行人也御侍也

黃帝命大容作咸池之樂是為雲門大卷著之控

楬以道其和中春之月乙卯之辰日在奎奏之命

日咸池堯修用之世遂謂堯樂控即祝楬即啟也

顓頊命飛龍氏會八風之音為圭水之曲浮金効

珍於是鑄之為鐘作五基六英之樂名曰承雲二

女娥皇女英也馮夷華陰潼鄉人得仙道為河伯

恒乘雲車駕二龍儵忽萬里繆虬屈曲貌便娟長
嬋貌撓曲也翥舉也

舒并節以馳騫兮。遠絕垠乎寒門。軼迅風於清源兮。
從顓頊乎層冰。歷玄冥以邪徑兮。乘間維以反顧。召
黔羸而見之兮。為余先乎平路。經營四方兮。周流六
漠。上至列缺兮。降望大壑。下崢嶸而無地兮。上寥廓
而無天。視儵忽而無見兮。聽惝怳而無聞。超無為以
至清兮。與泰初而為鄰。
連勅角反。門斗彌中反。軼音
逸。黔其炎反。羸倫為反。漠漢

樂歌作幕崢鋤耕反
嶸音宏。聞叶無巾反。

陸時雍曰。九陰之地為寒門。五寒所自出也。北方
其帝顓頊。其神玄冥。間維者。天有六間。地有四維
也。淮南子。東北為報德之維。西南為背陽之維。東
南為常羊之維。西北為號通之維。黔羸造化神名。
列缺電隙也。謂之天門。大壑。山海經。東海之外大
壑。少昊孺顓頊於此。棄其琴瑟。又淮南子。南游罔
亥之野。北息沉墨之鄉。西窮宵冥之黨。東開鴻濛
之先。此其下無地而上無天。聽焉無聞。視焉無矚。
此其外猶有汰沃之汜。正為此注。

楚辭卷三終

楚辭卷四

古樵李陸時雍疏

附周拱辰別註

天問

陸時雍敘曰詩稱昊天抑何號號而天之降亂
 滋甚今人終日呼天天卒未有應者謂天不聰
 其殆非也屈原正其義詭其詞錯舉往昔為問
 斯亦無救於天而祇自恚耳何試上自予忠名
 彌彰此問又曷可少哉嗚呼自原作天問以來

李挺曰悲感
 頓踏無限深
 情再起史遷
 何以復尚

而此意不明大都為覽古者之所憑弔今其詞固多存而不可論云

曰遂古之初誰傳道之上下未形何由考之冥昭瞢

闇誰能極之馮翼惟像何以識之

瞢莫鄧反馮皮冰反

周拱辰曰遂古之初無古也有古則有可傳無古矣又何傳斯時輕清未分幽明未剖又何由考之而極之而識之靈憲曰太素之前幽清玄靜寂寞冥默不可形像厥中惟虛厥外惟無斯謂冥滓此非問於無可問也既有天地之後未有天地之前無之而非天也云爾

明明闇闇惟時何為陰陽三合何本何化

化叶虎為反

陸時雍曰穀梁子云獨陰不生獨陽不生獨天不生三合然後生一陰一陽而又有一非陰非陽為陰為陽者三者常合而不舍也一即是本兩即是化更何本何化故曰一生二二生三三生萬物天地萬物皆然矣

周拱辰曰明明闇闇明者成其明闇者成其闇也此不專指晝夜言天地日月星辰皆是斯時非猶

上所云無形無像之時也。已恍然拓出一箇世界。凡山河大地帝王賢聖草木禽魚都有生身托命處。故曰惟時何為言天地已闢矣。豈僅止天地之闢已乎。陰陽三合何本何化。蓋乾坤列彼此之位。六子成交配之功。震巽同宮。坎離互體。山澤通氣。三陰三陽合同而化也。元辰紀言陰陽之氣各有多少。如太陰為正陰。太陽為正陽。次少者為少陰。次少者為少陽。又次為陽明。又次為厥陰。故曰三陰三陽也。三陰三陽為標。寒暑燥濕風火為主。天真元氣分為六化以統坤元生成之用。此即本化之說也。

圓則九重孰營度之。惟茲何功孰初作之。幹維焉繫

天極焉。加入柱何當東南何虧。

度待洛反。幹一作荒。並音管焉。於虔切。篇

內並同。加叶音基。又如字。虧如字。又叶苦家反。

周拱辰曰。圓則九重。即所云天之門以九重也。孰經營而意度之。又此九重者。馮何功力而造作之。周天三百六十五度。五百八十九分度之一百四十五。半覆地上。半在地下。左旋右迴。運行不息。如

磨蟻然有不動者以為動之綱其幹軸維縻繫在何處天極者即所云南極北極也北極出地三十六度恒見不隱南極入地三十六度恒隱不見此何所交加而默奠之也地下有八柱名山大川孔穴相通當者砥當撐持之謂俗云地缺東南非真缺也特東南低陷耳地勢有高下理自如此。

九天之際安放安屬隅隈多有誰知其數

放上聲屬音注數所

句反

周拱辰曰安放安屬言何所屈隈何所托根猶象

山所云天安在何處也淮南天有九野九千九百

九十九隅余謂天圓地方地有四游觸着便成方

隅而實無定隅又誰窮其數乎。

天何所沓十二焉分日月安屬列星安噉

沓徒含反分叶數因

反屬之欲反

舊詰日月所會謂辰一歲日月十二會所會為辰

十一月辰在星紀十二月辰在玄枵之類是也若

以地而言則前後左右亦有四方十二辰之位焉

但在地之位一定不易而在天之象運轉不停惟

天之鶉火加於地之午位乃與地相合而得天運之正耳蓋周天三百六十五度四分度之一周布二十八宿以著天體而定四方之位以天繞地則一晝一夜適周一匝而又超一度日月五星亦隨天繞地而惟日之行一日一周無餘無欠其餘則皆有遲速之差焉張衡靈憲曰星也者體生於地。精。成。於。天。列。位。錯。峙。各。有。攸。屬。斯。言。當。矣。

周拱辰日沓者重沓之謂亦交沓之謂天之中有地地之中有天猶易所稱緼網磨盪也十二辰支干相配起於甲寅而天道週矣二十八宿以是分而天之躔度不忒。東西南北以是分而地之方向不惑。歲以是分而年不亂。月以是分而時不易。晝夜以是分而人知度。十二律以是分而禮樂興。然是十二之所分也。有分十二者還須問之太乙屬有繫屬之義所謂黃道赤道循環運旋日月麗乎天也有分屬之義天一生水地二生火一結胎於離。一結胎於坎。一屬奇而專司晝。一屬偶而專司夜也。又有轉屬之義日往則月來月往則日來日

行每疾。月行每遲。日施曜而精熿。月借魄而光燦。所謂日月自相統屬也。衆星布列其以神著有五列焉。是爲三十五名。一居中央。謂之北斗。布於方爲二十八宿。中外之宮常明者百二十。有四可明者三百二十。爲星二千五百。微星之數萬一千五百二十。凡帝王卿相人事庶物。昆蟲咸繫命焉。噉者陳設也。分度分野森然布列也。又陳示也。所謂天垂象。現吉凶。稽飛流。隕忒。順逆伏見。以察機祥是也。

出自湯谷。次于蒙汜。自明及晦。所行幾里。

湯音陽一作暘汜音

似上聲

周拱辰曰。湯谷蒙汜皆地上川穴之名。日從地出。從地入也。朱晦翁以周天赤道答之大無謂。蓋日行空中而所過之影則有方。所猶飛鳥不着地而所過之影則涉某山某水程途近遠歷歷可數。淮南自日出於暘谷。浴於咸池。登於扶桑。至於曲阿。至於曾泉。至於桑野。至於衡陽。至於昆吾。至於鳥次。至於悲谷。至於女紀。至於淵虞。至於連石。至於

悲泉至於虞淵。至於蒙谷。自晨明至定昏。凡行九州七舍。有五億萬七千三百九里。

夜光何德。死則又育。厥利維何。而顧菟在腹。

菟與兔同

陸時雍曰。沈括有云。月本無光。日耀之。乃光光之。初生日在其傍。故光側而所見。纔如鈎耳。日漸遠。則斜照。而光稍滿。對照則正圓也。余謂陽烏陰菟。乃日月之魄。假物言之者也。魄陰而闇。如目中之有黑睛。假菟言之者。菟望月而生精。相感也。沈括又謂日月在天。如兩鏡相照。而地居其中。四旁皆空。水故月中微黑之處。乃鏡中天地所照之影。斯言恐未然也。

女歧無合。夫焉取九子。伯強何處。惠氣安在。

夫音扶。強巨良。

反在叶音紫

周拱辰曰。女歧神女。非指縫裳者言。不夫而孕九子。一乳而生。釋典號九子母。昔女媧氏無夫而生。男顓頊生女。截竹為筭。似類此。遂古至此。洪荒既闢矣。天地既奠矣。日月星既麗矣。至此漸漸生出。人來纔成世界。余謂九子。迺人類之種。女歧迺生。

育之母也。伯強惠氣風屬。上指日月星此專言風也。黃帝風經調暢祥和天之喜氣也。折揚奔厲天之怒氣也。淮南隅強不周風之所生也。諸稽攝提條風之所生也。註云隅強天神也。所云伯強即此。何闔而晦何開而明。角宿未旦。曜靈安臧。

闔胡臘反明叶音芒

宿音秀臧與藏同

舊註角宿東方星隨天運轉不常在東

周拱辰曰安臧者藏於何所也。山海經常陽之山日月所入又穹天論日繞辰極沒西而還東不出入地中據山海經則日藏地中據穹天論則日藏空中也。吾安得凌倒景騎日月出入天地而一捫視之乎。

不任汨鴻師何以尚之。僉曰何憂何不課而行之。

汨音

骨尚叶音常行叶戶郎反

陸時雍曰四岳薦鮪帝曰咈哉方命圯族則不任汨鴻帝所知也。而曰何不課而行之若疑之若訝之。此其所為天問之辭難以理論事質者也。然則堯之所以使鮪者何也。當時在廷諸臣治水之事

亦未有能踰鮌者。僉曰：可使則堯姑使之。此古人所謂不得已而用之者也。迨九載績用弗成，亦未嘗加有害於天下於堯何損焉。汨治也。鴻，大水也。師衆也。尚舉也。課試也。天問中有一等漫興語，如此類是也。

鴟龜曳銜，鮌何聽焉。順欲成功，帝何刑焉。

鴟處脂反。聽叶平聲。

周拱辰曰：鴟，龜曳銜，經稱鮌墜洪水，傳稱鮌障洪水。國語又稱其墮高堙，卑蓋鴟龜曳銜鮌障水法也。鮌，覩鴟龜曳尾相銜，因而築為長堤高城，參差

綿亘，亦如鴟龜之曳尾相銜者然。程子曰：今河北有鮌堤而無禹堤。通志曰：堯封鮌為崇伯，使之治水。廼典徒役作九仞之城。又淮南：鮌作三仞之城。諸侯恃之。史稽曰：張儀依龜跡築蜀城，非猶夫崇伯之智也。即其證。順欲成功，言順此治水未必不成功。帝何以必加之刑耶。

永遏在羽山，夫何三年不施。伯禹腹鮌，夫何以變化。

施叶所加反，又如字。一作弛腹。一作復筆力反，化叶虎瓜反，又音摩。

周拱辰曰：書稱殛於猶言貶於實未嘗殺之。則永

過在羽山似乎永不施矣而曰三年何也公羊註
 古人疑獄三年而始定三年不施永不施矣惟有
 永過之已耳易曰君子以過惡揚善過之云者過
 抑之使不得逞其伎倆也鮌實生禹迹其聖德夙
 成不但近邁父德抑且遠紹列辟何以變化之若
 是神異也

纂就前緒遂成考功何續初繼業而厥謀不同

纂作管反

緒音敘

陸時雍曰箕子有言鮌墮洪水汨陳其五行蓋築
 堤以障其下流之勢而禹則順而導之耳此本無
 可問者而彼若謂父子異行初終殊效人事不齊
 有如此者故若疑而問之也

洪泉極深何以寘之地方九則何以墳之

泉疑當作淵唐本避

諱而改之也寘與填同則一作州墳叶敷連反

周拱辰曰按洪水滔天宜曰極大而此曰極深似
 不泛指洪水言也晦翁以泉為淵極是淮南子凡
 洪水淵藪有九淵禹乃息土填洪水為名山似指
 此九則者九州也帝嚳制九州洪水時經塗界限

漫滅莫理洪水既治。故道宛然。左傳茫茫禹迹。畫為九州。非禹始創畫之也。言襄陵之勢既夷。而九州之界限復井然隆起。歷歷可稽也。

應龍何畫。河海何歷。

畫音或歷。叶音勒。

周拱辰曰。有翼而飛者為應龍。應龍佐禹治水。畫地泉流為說已久。又嶽瀆經堯時九年洪水。巫支祈為孽。蓋水妖也。應龍驅之淮陽龜山足下。其後水平。禹廼放應龍於東海之區。又呂氏春秋大禹東至博木。日出九津。鳥谷。青山之鄉。南至丹栗。沸水之際。西過三危之阨。巫山之下。北至太正之谷。夏海之窮。積冰積石之間。未嘗暇息。至於歷中國之某河某海。又不足言矣。

鮌何所營。禹何所成。康回憑怒。墜何故。以東南傾。

憑皮

膺反墜古地字

周拱辰曰。鮌之營也。何術。禹之成也。何功。鮌之治水也。龜之禹之治水也。龍之嗚呼此成敗之由耶。

康回共工名與顓頊爭帝。怒觸不周山。折天柱。絕地維。天傾西北。地陷東南。

九州安錯川谷何洿東流不溢孰知其故

安一作何錯七故反

洿音戶

周拱辰曰帝嚳制九州按孔安國註一冀州帝都
不說境界以餘州所至則可知一梁州東距華山
之陽西據黑水一兗州東南據濟西北距河一青
州東北至海西北距岱一徐州東至海南至淮北
至岱一揚州北至淮東南至於海一荊州北距荆
山南盡衡山之陽一豫州西南至荆山北距大河
一雍州西據黑水東距河龍門之河在冀州之西

錯者如犬牙相制然也川谷何洿洿深也宇宙內
有九淵極深又列子渤海之東有大壑焉實為無
底之谷東流不溢諸家皆為歸墟受之之說所誤
予嘗見善飲者至一石不醉私自念言腹僅貯一
斗餘而所受踰十倍非其量之能受迺其量之能
消即佛語所云消受也東流不溢妙處不在能受
正在能消所以為造化之神我朝楊升庵以柳子
之對朱子之註為非而曰歸墟尾閭是水之大窮

盡大升降處窮盡升降二語猶未夢見在

李思謫曰有
此快論隻立
千古

東西南北其脩孰多南北順墮其衍幾何

墮一作墮音一作墮音

妥又徒禾反

陸時雍曰淮南子云闔四海之內東西二萬八千里南北二萬六千里禹使太章步自東極至於西極二億三萬三千五百里七十五步使豎亥步自北極至於南極二億三萬三千五百里七十五步則大較如是矣而又曰南北順墮其衍幾何則似南北狹而東西長也張衡靈憲經曰八極之維徑二億三萬二千三百里南北則短減千里東西則廣增千里自地至天半於八極則地之深亦如之二說略殊而張言似與此合矣墮謂狹而長也

崑崙縣圃其尻安在增城九重其高幾里

縣音玄

陸時雍曰崑崙墟在西北去嵩高五萬里地之中也崑崙說曰崑崙之山三級下曰樊桐一名板松二曰玄圃一名閼風上曰增城一名天庭是謂大帝之居淮南子云增城九重其高萬一千里百一十四步二尺六寸張子房赤寔經云崑崙天柱萬脉由起面居西雍耳目口鼻幽冀川蜀分左右背

懸心關腦腹垂洛沔為汧為渭大河大江經絡榮
衛大腸膀胱震澤壘濟青齊以降是為髓脾洩為
尾閭西北綿亘幽寒莫詣為背為項為脊為毳下
為齧尻音居脊骨盡處以身按之乃知崑崙之尻
在西北無盡際矣齧即居也朱晦翁讀尻為居義
亦如是為釋則誤矣

四方之門其誰從焉西北辟啓何氣通焉

辟與闢同一作開

周拱辰曰淮南崑崙有四百四十門門間四里里
間九純純丈五尺北門開以納不周之風

日安不到燭龍何照羲和之未揚若華何光

照叶之浩反揚

一作陽

陸時雍曰天地間儘有陰陽不匝處東有無雷之
國西有無雨之國北有無日之國又造天地經祭
河婁國土人無有日月光

周拱辰曰山海經西北海之外有章尾山有神人
面蛇身而赤是燭九陰是謂燭龍又大荒經鍾山
之神名曰燭陰視為晝冥為夜吹為冬呼為夏身
長千里在無脊之東又淮南曰龍身一足若木在

建木西其華照下地。一借照燭龍晝常昏暗。一若木普光夜亦常明。同一宇宙何明暗不均。若是懸乎。

何所冬煖何所夏寒。

周拱辰曰遠遊南州炎德桂樹冬榮又大招南有炎火千里又招蒐北方層冰峨峨飛雪千里又代水不可涉天白灑灑寒凝凝只皆騷中自註又拾遺記岱輿山有員淵千里常沸騰孟冬水涸山人掘之碎火如蒸以燭投之則燃又炎海有沃焦山冬夏常沸山爲之焦淮南崑崙之丘或上倍之是謂涼風之山又水經註崑崙爲無熱丘。

焉有石林何獸能言。

周拱辰曰道阜生瑤筍千年一芽鬱然成林又拾遺記須彌山第六層有五色玉樹蔭翳五百里玉樹石色如玉也又述異記陽泉在天餘山北清流數十步所涵草木皆化爲石獸之能言者不獨猩猩也狒狒善笑作人言角端人言又含塗之國鳥獸能言又紀祥錄黃帝至東海白澤人言又夷狄

有狗國有蛇國有人魚國有鼠王國皆獸也。皆言也。周禮命夷貊掌鳥言命貉貊掌獸言。然則獸之能言者夥矣。

焉有龍虬負熊以遊。

周拱辰曰熊雄猛食人形軀甚小虬龍與熊絕不相類而相負以遊蓋神熊也。山海經熊山有穴焉熊之穴恒出神人即此也。

雄虺九首儵忽焉在何所不處長人何守。

虺許偉反儵與條同

周拱辰曰雄虺無考山海經開明九首抱朴子石

脩九首皆神物也雄虺意即此類神異經不處民

在交脛東其為人黑色壽不處又無脊之國在長

股東其人穴居食土灰即埋之其心不朽處百廿

歲乃復更生抱朴子乘雲壘產之國肝心不朽之

民是也又員嶠山有陀移國人長三尺壽萬歲長

人不獨防風氏左傳僑如緣斯焚如榮如簡如同

守鄭瞞之國皆是又康回首觸不周柱折維闕比

身橫九畝者又過之矣又洞冥記支提國人長三

丈二尺又河圖玉版龍伯國人長三十丈

靡萍九衢泉華安居靈蛇吞象厥大何如

萍一作莽泉相里反

靈一作骨大一作骨

舊註靡萍九衢言其枝九出也浮山有草其葉如

泉南海有巴蛇身長百尋食象三年而出其骨

黑水玄趾三危安在延年不灰壽何所止

周拱辰曰山海經黑水之西有朝雲之國司彘之

國又冥海北有黑河又淮南三危在樂民西又自

崑崙流沙沉羽西至三危之山玄趾無考意即所

云玄股之國者是也黑河之藻可以千歲三危之

露可以輕舉又三危金臺石室食氣不灰然遂能

與天地相畢乎徒取延年終歸有盡何所止言畢

竟有止云爾

鮫魚何所旆堆焉處羿焉蹕日烏焉解羽

鮫音陵旆音祈堆多

回反蹕說文云射也音畢烏柳云當作鳥

舊註鮫魚有四足似鼉而短小出南方山海經曰

西海中近列姑射山有陵魚人面人手魚身北號

山有鳥狀如雞而白首鼠足名曰旆雀食人

周拱辰曰羿焉蹕日二句舊訓抹却焉字而曰羿

射九日九鳥墮其羽非也。二焉字即甌雀焉處焉。字問詞也。言十日並出羿即神射豈能發而參天乎。以何術而能射落九日也。且蹲而發矢之地何地也。鳥以風化鳥為朔風所吹轉吹轉高搏入罡風即化而無惟羽毛解落在地耳。解羽之處還在何所。水經注流沙積羽之鄉是也。

禹之力獻功降省下土方焉得彼龠山女而通之于台桑閔妃匹合厥身是繼胡為嗜不同味而快鼃飽。

功叶音光土方句絕蓋用商頌語龠一作涂音塗鼃一作朝陟遙反飽與繼叶疑有備音

陸時雍曰問之意似謂禹承命獻功而得通龠山女於台桑是疑聖人之忽君臣也。既閔妃匹合惟厥身之是繼耳。胡為嗜不同味而快鼃飽又疑聖人之輕父子也。所云堯舜之抗行被以不慈之偽名大率類此。所以為憤辭也。嗜味之美人所同也。嗜不同味而快鼃飽則所安者惡食而所快者鼃飽也。則禹之所嗜不在人情之內矣。鮑照詩曰居人掩閨歎行子中夜飯食梅嘗苦酸衣綈嘗苦寒旅人況味當自如此。鼃飽猶左傳所謂蓐食書曰

娶於嶽山辛壬癸甲則禹之居室僅四日耳閔憂也

啓代益作后卒然離蠶何啓惟憂而能拘是達蠶一作孽

一作孽並魚列反

周拱辰曰離蠶一云啓與有扈大戰於甘一云益

于啓位啓殺之越絕何以云啓善犧於益也按說

文蠶一云妖孽不祥也炎帝之繼太昊高陽之繼

金天高辛之繼高陽虞之繼唐夏之繼虞皆以異

姓禪者也啓獨排父之所薦以自帝衆共指爲不

祥也一云蠶歌謠也子輿氏所云天下之謳歌者

不謳歌益而謳歌啓是也皆出人意外故曰卒然

惟啓能克憂勤敬承繼禹故私一家之傳不爲違

天違先人之薦不爲悖父也故曰啓惟憂而拘是

達也

皆歸朕籥而無害厥躬何后益作革而禹播降朕一作射

籥音菊一作鞠降叶胡攻反

陸時雍曰宜闕

啓棘賓商九辨九歌何勤子屠母而分竟地歌叶巨依

反地叶
音低

陸時雍曰山海經夏后開上三嬪於天得九辨九歌於下朱晦翁謂啓棘賓商當是啓夢賓天說有明文無疑也勤子屠母淮南子云禹治水時自化為熊以通輻輳之道塗山女見而慙遂化為石時方孕啓禹曰還我子於是石破北方而甞子其石在嵩山間意謂啓上賓天得九辨九歌此天方開夏豈患無嗣禹何汲汲然者當化石之時乃勤屠母而歿分竟地也人化為石石裂竟地則不可以復形生歿界分神人道隔在此際矣原之此間似千載以下結為無情之痛如此要亦漫興語耳嬪當作賓註謂獻三美女於天帝妄矣

帝降夷羿革孽夏民胡歟夫河伯而妻彼雒嬪歟食亦反

妻七
計反

舊註傳曰河伯化為白龍遊於水旁羿見歟之眇其左目又羿夢與洛神宓女交

周拱辰曰羿革孽夏民而歸之帝降言雖夷羿之造孽實天意也歟河伯妻雒嬪味何歟而妻語意

李思諒曰此
註巧慧特甚

蓋一串事也言羿既歟河伯矣雜嬪亦水神即河
伯眷屬也不以為仇而反與之婚何耶河伯而魚
服處妃而行露不可解者一也戕其主伯聘其妃
侶不可解者二也馮技而好殺畏威而薦姻不可
解者三也訖上帝而以為無罪狎靈妃而以為固
然不可解者四也凶而嗜淫抑又甚焉而播毒夏
民偃然盜帝不可解者五也

馮珽利決封豨是歟何獻蒸肉之膏而后帝不若

馮珽音遙豨虛豈反歟
叶時若反蒸一作烝

周拱辰曰馮珽利決言引蜃弓穿象闔也歟神獸
薦鼎馨媚帝而帝不若天實怒我逆取而順守之
得乎似言羿事

浞娶純狐眩妻爰謀何羿之歟革而交吞揆之

謀叶謨
悲反

浞士
角反

陸時雍曰舊註謂以羿之勇力如此而浞有眩妻
爰謀因與家眾交并而吞滅之也歟革猶言貫革
此之為問若疑之實快之也

阻窮西征巖何越焉化為黃熊巫何活焉

舊註此言鮫事然羽山東裔而此言西征已不可
曉或謂越巖墜歿亦無明文左傳言鮫化為黃熊
國語作黃能熊獸名能三足鯨獸非入水之物故
是鯨也或云東海人祭禹廟不用熊白及鯨豈鮫

悲 為二物乎

黃。藿。音。九。 一作藿。 陸時雍曰秬黍黑黍莆藿水草也言禹平治水土
咸播五穀莆藿之地亦得耕營厥功大矣宜其蓋

鮫之愆何故既已并投而惡聲復長滿於世也并
投者當年之事疾盈者後世之稱原之此問蓋歎
之也君父之事力有所不得用臣子之心常有時
而窮若此者古今豈一事哉脩長也

白。蜺。嬰。茀。胡。為。此。堂。安。得。夫。良。藥。不。能。固。臧。天。式。從
橫。陽。離。爰。歿。大。鳥。何。鳴。夫。焉。喪。厥。體。

茀音拂得下一
有失字從卽容

反喪息
浪反

周拱辰曰王逸註列仙傳云崔文子學仙於王子
儁子儁化為白蜺而嬰茀持藥與之文子驚怪引

戈擊蜺因墮其藥俯而視之子僑之尸也須臾化為大鳥飛鳴而去是則然矣中間天式從橫而曰天法有善陽離爰死而曰人失陽氣則死大謬言子僑既得天道從橫變化之術故顯神通因文子之擊陽為死耳陽死者佯死也化鳥飛鳴夫豈厥體之喪而真死乎。

萍號起雨何以興之撰體脅鹿何以膺之

萍一作萍
一作萍音

瓶號胡刀反撰雛
兔反脅虛業反

陸時雍曰舊註云萍萍翳雨師名號呼也天撰十

二神鹿一身八足兩頭何以膺受此形體此當闕

疑

鼇戴山抃何以安之釋舟陵行何以遷之

鼇音敖戴
一作載抃

音弁安叶
一先反

陸時雍曰列子云渤海東不知幾億萬里有大壑焉實惟無底之壑名曰歸墟中有五山岱嶼員嶠方壺瀛洲蓬萊高下周旋三萬里平頂處九千里一日一夜飛相往來不可數焉帝命禹強使巨鼇十五舉首戴之迭為三番六萬歲一交焉五山始

峙

李思誌曰此
事宜存於本
文恐未相似

周拱辰曰列仙傳稱巨靈之鼇背負蓬萊之山而
拊舞鼇即大不大於蓬萊之山也何以安之也釋
舟陵行王逸謂鼇釋水而陵行不通甚矣按洽聞
記荊州有空舫夾絕崖壁立數百仞飛鳥不栖傳
云洪水時行舟者泊爨於此疑即此山至大而鼇
亦可負陵至峻而舟亦可遷真足傳千古之疑也
惟澆在戶何求于嫂何少康逐犬而顛隕厥首女歧
縫裳而館同爰止何顛易厥首而親以逢殆

澆五弔
及嫂叶

音叟易上一有隕
字殆叶當以反

周拱辰曰沈約竹書註少康使汝艾謀澆初浞娶
純狐氏有子蚤死其婦曰女歧寡居澆強圍往至
其戶佯有所求女歧為之縫裳同舍止宿汝艾夜
使人襲斷其首乃女歧也澆既多力又善害人艾
乃攻獵放犬逐獸因喉澆顛隕乃斬澆以歸兩段
文氣倒而意實融貫親以逢殆指逐犬顛隕言也
言汝艾欲襲殺澆而顛易女歧之首似可僥倖逃
死矣而卒不免逐犬之厄逆賊之無逃於天誅也

如此。

湯謀易旅何以厚之覆舟斟尋何道取之

斟職深反取此苟反

陸時雍曰仲康崩相繼立依同姓諸侯斟灌斟鄩氏爲澆所滅湯當是康字謂少康也

周拱辰曰一成一旅能收夏衆康可謂善謀者矣向非虞思君娶以二姚錫之綸邑百端匡植當澆使椒求康之時殆矣卽免於難亦庖正止耳安能收燼滅泥祀夏配天平何以厚之以旌虞也相旣覆舟斟鄩之國矣而康復取之豈其無道而至此

其間觀變俟時強力忍詢委曲隱忍潛圖密慮經營四十年而天命默爲挽回其道得也令少康君臣於此數十年中力淺謀疎躁不能待幾事不密身且不保況國乎張廣漢曰其潛也若蛟龍之深潛故其發也若雷霆之震迅惟其時也有旨哉

桀伐蒙山何所得焉妹嬉何肆湯何極焉

得叶徒力反妹音未

嬉音喜

周拱辰曰蒙山之伐桀利在得也得一美人失一國家折閱多矣或曰南巢之放乃與妹嬉及嬖媵

五百人同竄桀且曰猶吾得也而已矣

舜閔在家父何以鰥堯不姚告二女何親

鰥古頑反 叶音矜

厥萌在初何所意焉璜臺十成誰所極焉

意古億字 璜音黃

周拱辰曰韓非紂為象箸而箕子怖以為象箸不

盛羹於土簋則必犀玉之杯玉杯象箸必不盛菽

藿則必旌象豹胎旌象豹胎必不衣短褐而舍茅

茨之下則必錦衣九重高臺廣室聖人見微以知

萌見端以知末也璜臺十成而曰誰所極言紂之

侈奢至瓊宮玉宇亦極矣亦知即初念之萌極之

乎止濫觴者窒其穴去高木者揉其蘂言謹微也

登立為帝孰道尚之女媧有體孰制匠之

媧古華反

周拱辰曰舊以登立為帝屬伏羲非也人皇以上

燧人以下帝者多矣何以專指羲乎余謂皆指女

媧說蓋問中儘有上句不說出人名下二句纔指

出者如吳獲迄古南嶽是止孰期去斯得兩男子

吳獲迄古二句即下兩男子事也如天命反側何

罰何佑齊桓九合卒然身殺天命反側二句即下

齊桓事也如何聖人之一德卒其異方梅伯受醢

箕子佯狂聖人一德二句卽下梅伯箕子事也蓋
上二句先述事迹下二句纔倒出人名問中多有
此句法女媧伏羲氏妹自古皆以男子帝天下女
媧獨以女子爲天下君豈女媧自擅而自立之乎
抑伏羲以天下私不傳之子不傳之弟不傳之臣
獨傳之妹乎又豈女媧聖德遠邁往帝羣臣百姓
自往從之乎孰道尚之言稟何道德天下翕然尊
尚之也。按女媧生而神靈佐太昊正婚姻是爲神
媒共工作亂振滔洪水以禍天下女媧誅殺之都
於中皇之山鍊五色石以補蒼天斷鼇足以立四
極殺黑龍以濟冀州積蘆灰以止淫水又作笙簧
以通殊風用十五絃之瑟於澤丘以郊天侑神聽
之極悲乃更爲二十五絃以抑其情而樂乃和乘
雷車駕應龍登九天朝帝於靈門淮南所云考其
功烈上際九天下契黃墟者也傳言女媧風姓本
伏羲言之不知媧媧雲姓古聖人帝天下有不襲
姓者也。河圖挺佐輔云女媧牛首蛇身宣髮玄中
記云伏羲龍身女媧蛇身列子以爲皆蛇身牛首

虎鼻蓋人之形有同乎物者今相家者流取象禽獸之形體者是也孰制匠之言孰主宰而治制之也女子帝天下者前有媧後有墨開闢以來所未有扶綱常而警伏雌可少此屈原之一問哉舜服厥弟終然為害何肆犬豕而厥身不危敗

周拱辰曰厥身不危敗舊以為舜不誅象非也言焚廩浚井亦大逞犬豕之謀矣鳥工龍工厥身卒免於難抑何神而至此也此專指舜言後段眩弟並危纔指象說

吳獲迄古南嶽是止孰期去斯得兩男子

迄許訖反

舊註南嶽是止竄荆蠻而採藥也兩男子太伯仲雍也

緣鵠飾玉后帝是饗何承謀夏桀終以滅喪

一無夏字喪去

聲一作卷

周拱辰曰王逸晦翁咸謂湯承用伊尹之謀滅桀自來無以君承臣之說語氣亦直致無文且終以二字如何着落言伊尹烹鵠羹薦玉鼎以干湯於是尹承湯密謀以事桀而終以滅桀也竹書十七

年商使伊尹來朝二十年伊尹歸於商呂氏春秋
湯欲令伊尹往視曠夏恐其不信乃自射伊尹伊
尹奔夏三年聽於妹嬉之言以告湯湯良車七十
乘必死六千人以戊子戰於郟遂禽伊摯就桀湯
實命之承謀者承湯之命為桀謀也始輔之卒滅
之聖人舉動若是兩截乎。

帝乃降觀下逢伊摯何條放致罰而黎服大說

乃一作力

摯如字卽說叶稅摯音哲卽說音悅

周拱辰曰降觀者卽所云成湯東巡也不意中得

一良相故云逢聲罪而黎服大說雖水火之民易

見德然堯舜禪而民說湯放伐而民亦說古今并

降之際可為慨然

簡狄在臺譽何宜玄鳥致貽女何喜

臺叶徒其反譽苦篤反貽一作

詒喜叶音嬉一作嬉叶音基

周拱辰曰媿女吞鵲卵生契事詳見商頌史記又

高辛氏與簡狄祈於郊禱鵲遺卵簡狄在臺豈築

臺以郊故云在臺乎

該秉季德厥父是臧胡終弊于有扈牧夫牛羊

陸時雍曰宜闕

干協時舞何以懷之平脅曼膚何以肥之

懷叶胡威反曼音萬

陸時雍曰有苗逆命頑已甚矣而舜以干羽合舞

兩階七旬乃格遵何道與是可念也實可師也當

紂之時人心離矣憂懼不遑而平脅曼膚何所養

而肥澤至此是可哈也復可鑒也

有扈牧豎云何而逢擊牀先出其命何從

豎臣庚反命何一作

所何

陸時雍曰宜闕

恒秉季德焉得夫朴牛何往營班祿不但還來

朴匹角反

一云平豆反無朴音牛叶魚奇反來叶力之反

周拱辰曰朴牛事衆解憤憤越絕書曰湯獻牛荆

之伯之伯者荊州之君也湯行仁義敬鬼神當是

時天下未從也湯於是乃飾犧牛以事荆伯乃媿

然曰失事聖人禮乃委其誠心此謂湯獻牛荆之

伯也恒秉季德者睦鄰之德終如其始也淮南子

曰始乎叔季歸乎伯孟季德者初德也湯得朴牛

而不以自享曰以享鄰湯之祿也荆得之而薦其

李思謫曰此
事更宜他詳

祖先且以謝過荆之祿也兩皆受其賜豈區區尋
常往來之禮乎故曰往營班祿不但還來

昏微遵迹有狄不寧何繁鳥萃棘負子肆情

遵一作循

陸時雍曰舊詁謂人循闇微之道為戎狄之行者
不可以安其身晉大夫解居父聘吳過陳之墓門
見婦人負子欲與之淫婦人引詩刺之曰墓門有
棘有鸚萃止余謂此事不類故宜闕之

眩弟並淫危害厥兄何變化以作詐而後嗣逢長

一害

作虞兄叶虛良反
而一在嗣字下

陸時雍曰王逸以為象封有鼻是也有鼻之祚修
短無聞問意似謂以象之作詐當不能保其身而
何有於子孫也然黃帝分封萬國周之同姓封者
七十豈盡懿德哉有先王之令德以庇其子庶有
天之福澤以昌其本枝固宜咸保令融有引勿替
也象至不道得舜而昌殷士膚斂其麗不億因紂
而亡嗚呼念之哉

成湯東巡有莘爰極何乞彼小臣而吉妃是得

莘所
巾反

得叶徒
力反

周拱辰曰何乞彼小臣而吉妃是得言乞小臣而何以必借煤於吉妃也嘲之也世紀湯感夢有人抱鼎俎對已而笑寤而求伊摯於有莘之野有莘之君畱而不進湯乃求婚於有莘之君遂嫁女於湯以摯為媵臣巧於聘妃巧於聘臣者乎

水濱之木得彼小子夫何惡之媵有莘之婦

一無彼字惡烏

路反婦叶芳尾反

陸時雍曰伊尹母姪夢神女告之曰白竈生鼃亟去無顧居無何白竈中生鼃母去東走顧視其邑

盡為大水母因溺水化為空桑之水水乾之後有

小兒啼水涯人取養之既長有殊材有莘惡其從

空桑出因以媵女夫何惡之媵有莘之婦蓋歎之

也所云棄騏驎而不乘更遑遑其焉索者非歟

周拱辰曰伊生空桑為說已久夫何惡之媵有莘

之婦湯乞小臣借謀於吉妃伊干有湯借兆於莘

婦然則謂有莘之女為商家四百九十六年薦賢

之功臣亦可也

湯出重泉夫何臯尤不勝心伐帝夫誰使挑之

臯古罪字

尤叶於其反
挑徒了反

周拱辰曰太公金匱桀怒湯以諛臣趙梁計召而
囚之均臺寘之重泉湯乃行賂桀遂釋之賞之贊
茅不勝心伐帝舊訓誤甚言伐帝非湯本心有挑
之者矣分明指伊尹說說湯以至味曰天子然後
可具以味挑也奔夏三年反報於亳曰桀迷於妹
嬉好彼宛琰以謀挑也

會鼃爭盟何踐吾期蒼鳥羣飛孰使萃之

舊註武王伐紂紂使膠鬲視武王師膠鬲問曰欲

以何日行師武王曰以甲子日膠鬲還報紂會天

大雨道難行武王晝夜行或諫曰雨甚軍士苦之

請且休息武王曰吾許膠鬲以甲子日至殷令報

紂矣吾甲子日不到紂必殺之吾故不敢休息以

救賢者之歿也遂以甲子日誅紂

周拱辰曰此下四段段段有不滿武王意亦屈原

自附夷齊之義也言武王冒雨急進豈真欲救膠

鬲之歿哉非爭其失期也爭其得時耳鷹隼之衆

羣集飛揚問誰統帥之此非指武王指尚父也堂

張煥如曰當
武王視師之
時未有紂名
此記事之不
審耳

堂之師必借謀於陰符六韜之將畧何歟

列擊紂躬叔旦不嘉何親揆發定周之命以咨嗟

無一

何字一無
之以二字

周拱辰曰太白之懸亦太慘矣曰不嘉曰咨嗟明乎且雖佐發定命非其心也況親斬紂頭比巢門

之禽更甚乎

授殷天下其位安施反成乃亡其罪伊何

施叶所加
反若如字

卽下何叶音
奚反一作及

周拱辰曰何以曰授殷天下三分有二以服事殷

殷之天下實周授之也猶三以天下讓意其位安

施言讓之以位則宜知所以善保其位矣而善保

之術又安施耶成全也言父委曲全之子一旦廢

之紂雖得罪於天未始得罪於臣其罪伊何恐數

紂之罪而紂不服也

爭遣伐器何以行之並驅擊翼何以將之

行叶戶
郎反

周拱辰曰爭遣伐器言遣調戰伐之器也並驅擊

翼並進而擊其左右翼也何以行之何以將之皆

隱語言以仁伐不仁何用許多陰謀權詭使後世

疑也

昭后成遊南土爰底厥利維何逢彼白雉

底音指

舊註昭王南巡船壞而溺卽左傳所云南征不復也白雉無考

穆王巧梅夫何周流環理天下夫何索求

梅芒改反周上一有

爲字

周拱辰曰梅說文訓貪晦翁因訓貪求則下句夫何索求句便贅矣余謂當訓貪樂之貪爲是言穆王挾造父駕八駿勞馮夷銘玄圃釣珠澤射麗虎

謁王母而答歌過井公而縱博荒淫肆樂足跡幾遍天下焉旣已爲天下君而僕僕車塵馬足抑似有求而勿獲者何故乎

妖夫曳銜何號于市周幽誰誅焉得夫褒姒

銜樊絹反

陸時雍曰周之亡褒姒爲之也褒姒亡周自壓弧箕服始也先童謠曰壓弧箕服實亡周國及是夫婦牽行賣壓弧箕服於市者而執之夜亡聞女啼聲收以奔褒後褒人入以贖罪是卽幽后所爲褒姒者也夏之衰也二龍止庭言曰余褒之二君也

告以糈幣。龍亡而遺其糈。積糈。至周厲王之世。啓
 積。糈流為玄黿。入後宮。處女遇之。孕。生女。棄去。彼
 歷。孤箕服者。所為挾以奔。褒也。原之言曰。妖夫曳
 銜。何號于市。意是夫之非人也。且號之有所使也。
 周幽誰誅。非周幽之罪也。褒姒之從來遠矣。其得
 入於王宮。怪矣。焉得夫褒姒亦非褒人之所知也。
 離騷九章止。言人事。天問言天。亦無所歸。咎云爾。
 天命反側。何罰何佑。齊桓九合。卒然身殺。
 佑叶於忌。反合一作

會殺
音弒

周拱辰曰。言何以條佑之。而牛耳中原。條罰之。而
 腐尸揚門之扇也。任管仲則霸。信豎刁。易牙諸人
 則亂。原曰。何罰何佑。吾則曰。亦自罰自佑。

彼王紂之躬。孰使亂惑。何惡輔弼。讒諂是服。
 惡烏路。反諂一

作調服。即服食之服。
 晦翁訓作事非是。

周拱辰曰。內惑於妲己。所謂女戎也。外惑於飛廉
 惡來。諸人猶之男戎也。彼王紂之躬哉。所云資辨
 捷給。聞見甚敏。材力過人。以天下為戚。出已下者
 也。具曰。予聖。誰知烏之雌雄。此語若為商辛寫照。

比于何逆而抑沉之雷開何順而賜封之封叶孚音反

周拱辰曰雷開阿紂進諛言紂賜金玉而封之賞以夏田或諫曰非時也君踐一日之苗民失終歲之食其可乎殺之

何聖人之一德卒其異方梅伯受醢箕子詳狂梅音浼詳

音祥

周拱辰曰箕子為之奴蓋囚之為奴如漢法髡鉗為城旦春論為鬼薪是也一勁直數諫不避菹醢一不瞽不聾托之佯狂迹異而忠君悟主之心則

一也

稷維元子帝何竺之投之于冰上鳥何燠之竺一作篤燠音

郁

舊註后稷名棄帝嚳之子其母有郃氏曰姜嫄出野見巨人跡說而踐之遂身動如孕居期生子棄之冰上鳥覆翼之竺當為天祝予之祝或天天是椽之椽以聲近而譌耳

何馮弓挾矢殊能將之既驚帝切激何逢長之伯昌號衰秉鞭作牧何令徹彼岐社命有殷國

周拱辰曰。弓矢。王逸以爲后稷。固非。補以爲武王。亦未必大。約不外周事者。近是。竹史。王嘉季歷之功。錫之圭瓚。巨鬯。彤弓。旅矢。九命爲伯。周之。馮有。弓。矢也。舊矣。旣浸以逼。帝。帝何以不疑。而長任之。號衰者。撫此衰世。而施號令。以蘇之也。魴魚。頰尾。窮民之仰望。父母也。久矣。秉鞭作牧。不止作六州之牧。史編。明年伐犬戎。明年伐密須。明年敗耆國。又。明年伐邠。又。明年伐崇。侯虎而作豐邑。又。王命西伯得專征伐。時三十二年也。周受天命。自此年始。所以卒能大岐之社於天下。撫有殷國。又何疑乎。

遷藏就岐。何能依。殷有惑婦。何所譏。

周拱辰曰。遷藏非徙寶藏之說。讀乃積乃倉一詩。則藏乃蓋藏之藏也。依亦非百姓隨依之不舍也。益四爻曰。利用爲依遷國。蓋流泉夕陽。幽居允荒。天設險勝。能依之以基王也。殷有惑婦。何所譏。非譏惑婦。譏用惑婦者耶。

受賜茲醢。西伯上告。何親就上帝。罰殷之命。以不救。

告叶古后反帝
下一有之字

陸時雍曰紂烹伯邑考以賜文王文王食之紂曰孰謂西伯聖者乎食其子而不知斯時紂之惡亦酷矣文王飲聲不言臣罪當誅況其子乎醢梅伯以賜諸侯得罪於天下矣西伯乃上告帝帝怒而致罰殷之命遂以不救語曰棄賢實惟棄天貫盈之罪所必不赦乎

師望在肆昌何識鼓刀揚聲后何喜

識與志同喜叶許寄反

周拱辰曰散宜生南宮适闕天學於太公太公見

三子之為人遂酌酒切脯約為朋友聲臭之合也

日何識日何喜風雲之契別有機緣劉勰新論曰

堯之知舜不違桑陰文之知尚不以永日眉睫之

微而形於色聲音之妙而動於心必待其下屠屠

牛上屠屠國之語而識之而喜之淺之窺聖人矣

武發殺殷何所悒載尸集戰何所急

悒音邑

周拱辰曰湯之伐桀放之而已竹書十八年桀卒

於亭山湯命禁絃歌舞是湯猶以天子之禮待死

桀也武則竟殺紂矣弔伐同而放殺異公憤乎私

陸時雍曰成湯有慚仲虺釋之武王誅紂而不以為意然夫子曰湯武革命順

乎天而應乎人而式王且以一六衡行寫恥意聖人心事各有極耳

憤乎載尸集戰王逸以爲載木主是矣味何所急語氣似與父死不葬爰及于戈意同大抵屈原千古狷忠也其於商周革命之際扼腕久矣信讒齎怒忍尤攘詢一種美人遲暮之思宛然臣罪當誅首陽采薇心事故於湯伐桀則曰終以滅喪曰何條放致伐於武伐紂則曰何所悒又曰何所急噫原所以悼下土之紛紜而願侶彭咸以自沉也伯林雉經維其何故何感天抑墜夫誰畏懼

陸時雍曰宜闕

皇天集命惟何戒之受禮天下又使至代之

陸時雍曰授大寶詔大戒天不以位私人也其戒伊何孟子輿之申說天與董仲舒之所對武帝者是也天與之人奉之所謂受禮天下也世受命而忘戒者多矣故爲問以醒之既受命於天下矣又使至代之甚矣其可畏也

周拱辰曰此亦命不於常意然非德后虐仇之說也古來如舜之代堯禹之代舜周之代商命之正也如羿與浞之代夏命之變也神器一耳有德者

居之以旌厥伐有力者亦有時讓之以逞其不肖之心福善禍淫正不必爾此正造物之茫茫未可以理叩也

初湯臣摯後茲承輔何卒官湯尊食宗緒

舊話初湯臣摯以為凡臣耳後知其賢而以為凝承輔弼也尊食宗緒上祀先人下及子孫也

周拱辰曰官即官天下之官卒官湯者推湯於諸侯之上而為天下君也尊食猶玉食萬方意

勳闔夢生少離散亡何壯武厲能流厥嚴

嚴叶五郎反詩殷武

篇有此例

陸時雍曰闔吳王闔廬夢闔廬之祖壽夢勳功也

吳之強自闔廬始屈原所以勳之也

周拱辰曰勳闔夢生言勳闔乃壽夢所生也少小散亡在外乃能刺王僚代為吳王後用伍員為將

碎鐘鞭尸聲震鄰國是能振其猛厲而流其威嚴也事詳在吳世家屈原侈言之以警楚乎

彭鏗斟雉帝何饗壽命永多夫何長

饗叶虛良反

周拱辰曰王逸訓鏗進雉羹於堯堯饗之而錫以

壽考至八百歲子厚又誤承之日夫歿自暮又誰
 饗以俾壽夫必饗之而俾以壽則帝當作上帝纔
 通若謂堯錫鏗壽則堯胡不能自壽至八百乎余
 謂二句平讀便自躍然言堯非嗜味者也鏗斟雉
 而堯饗之爵之彭城果僅味之薦乎抑重其道德
 焉而庸之乎壽有所受之者也鏗之延長何術之
 修豈能熊經鳥申之術乎抑別有修心鍊性之秘乎
 按彭鏗隱雲母山餐雲母不老後又為商大夫地
 行仙也

中央共牧后何怒蠡蛾微命力何固

牧一作收一作
收蠡音風蛾古

蟻
字

陸時雍曰宜闕

驚女采薇鹿何祐北至回水萃何喜

祐叶於
忌反

周拱辰曰驚女句指夷齊事也文選夷齊畢命於
 淑媛五臣注夷齊采薇首陽一女子見而譏之曰
 子義不食周粟此亦周之毛也又夷齊餓於首陽
 白鹿乳之言采薇而驚來女子之譏遂棄薇而餓
 白鹿又何以祐之而薦之乳乎北至回水或另一

事未有考闕之

兄有噬犬弟何欲易之以百兩卒無祿

噬音筮
兩音亮

周拱辰曰王逸以為秦公子鍼之事然與左傳不

同闕之

薄暮雷電歸何憂厥嚴不奉帝何求

伏匿穴處爰何云荆勳作師夫何長

自此至終篇
皆隔句叶韻

悞過改更我又何言吳光爭國久余是勝

悞一作寤
更音庚言

叶音銀勝
叶音商

何環穿自閭社丘陵爰出子文

環穿自閭社丘陵七
字一作環閭穿社以

及丘陵是淫
是蕩十二字

吾告堵敖以不長何試上自予忠名彌彰

試一作議
予音與彰

一作
章

周拱辰曰薄暮雷電以下舊詁瑣碎晦滯朱晦翁

又指為不可曉余熟讀數過瑩亮流暢語脉一貫

解人自曉耳若曰雷填填兮雨冥冥此何時也吾

其歸歟臣奉主為嚴君厥嚴欲奉而不得奉或者

忠未盡焉帝其怒我乎蹇蹇為患退修初服伏匿

穴處余固甘之夫荆而日循師矣豈靈長之道乎

李思誌曰意
融手快請解
可付祖龍

倘先王有靈大悔君心而光照前業我又何言然
 而隣敵日窺忠臣欲盡強侮多吳光之輩而異材
 少子文之人人之云亡邦國疹瘁吾蓋告堵敖以
 不長也吳光子文堵敖皆借語不敢顯指也若夫
 以所不必聽者嘗試君而自予以忠名余則何敢
 夫捷徑窘步而令臣以忠名彰則君危矣蘭邪椒
 佞而我獨以忠名彰則我又危矣不忠不可而忠
 又不可何途之從而可乎一段真懇痛哭之懷最
 為溢露讀者自得之

李挺曰其文
 在公羊檀弓

陸時雍曰或問乎余曰屈原之作天問也夫曷
 問乎爾曰天不平也巳不平矣又曷為問之曰
 天失其平人爭溺焉賢以為佞佞以為賢故有
 問也者而省之省之天之所不得有辭於人也
 巳問矣巳省矣為是寤而遂正之者為是信而
 不得已焉者也曰天聽而堅尚其人之與言屈
 原忠矣天將以為不肖其誰能爭之為是寤而
 遂正之者人將意而爭與之也如其天其不可
 問也久矣

楚辭卷四

終



